

Midada da redacziun tar la «Terra Grischuna»

Deditgà l'emprima numera da 2014 a la Val Schons

■ (anr/gc) 25 onns, dapi 1988, ha redegì Markus Joos cun dun e success la «Terra Grischuna», bain la pli enconuschenta e represchentativa revista per la natira, cultura e temp liber en il Grischun. El è stà pir il terz redactor dapi 71 onns ch'i dat la «Terra Grischuna».

Cun 2014 ha Christian Dettwiler surpiglià la redacziun da la «Terra Grischuna». El è già dètg enconuschent. In temp ha el lavurà tar la Televisiun Svizra ed è era stà curatur da la Casa melna a Flem. Ch'el è fitg versà en scriver demussa el tras ses excellent purtret davart l'enconuschent architect Gion A. Caminada da Vrin. Quel na saja betg in um da gronda canera, mo da plets reflectads e formulads cun ina clera filosofia. Il tema central dal «Denker aus Vrin» saja da «crear lieus», tegnend en egl e giوند eturn precautamain cun ils fatgs locals.

Ina tura tras la bella Val Schons

Blers enconuschian la Val Schons be sco ruta da trapassadi tranter Ziràn e Spleia. Quel che charrescha be tras manchenta da vesair bler: turs istoricas sco surtut baselgias da gronda valita. La pli enconuschenta è bain la baselgia-mumma da Schons, quella da s. Martin a Ziràn, cun ses palantschieu en lain dal 12. tschientaner e 153 maletgs ord la bibla. Qua sa tracti dal pli vegl palantschieu surmalegià sin lain da l'Occident cristian. En tut datti enta Schons 14 lieus – e mintgin che ha ses sanctuari. La pli giuvna baselgia è la catolica ad Andeer, consecrada 1963.

Ad Andeer sa chatta l'enconuschent Hotel Fravi cun ina lunga istorgia e tradiziun – era pervia da ses enconuschent bogn curativ collià. – Tgi sa era ch'i dat en Val Avras dapi onns ina senda da muntanellas, numnada Murmata, nua ch'ins intervegn bler da quel simpatic animal. Ad Avras, en il vitg dals Gualsers,



Cuverta da la nova «Terra Grischuna».

MAD

stat in bellezza edifizis, l'uschenumnada Chasa dals podestats. Questa tipica chasa da patrizians datescha dals 1664.

Cun «Il verd d'Andeer» è manegià il granit da là che vegn explotà en trais crapperas ch'existan passa 100 onns. Quel vegn utilisà oz dad enconuschents architects per lur edifizis sco material classic da construcziun. Er en il center da la citad da Cuir è il granit or da Schons da vesair.

Dapi 2013 exista il grond Parc natiral Beverin che cumpiglia quatter valladas e dus territoris linguistics (rumantsch e gualser). La finamira da l'uniun purtadra da quel parc è da tgirar e nizzegiar per-

sistentamain la custavla cuntrada sco era da sviluppar, promover ed intermediar cunscientamain la cultura. Il center d'infurmaziun e gestiun sa chatta a Vargistagn. En lez hotel cun restaurant è er il Center da capricorns installà, nua ch'i vegn perscrutà, cusseglià sco er organisà e structurà.

Tranter A – sco Avras – e Z – sco Ziràn – exista in vast spazi per er evenimentar diversas pussaivladads da far sport d'enviern. – In inscunter datti cun l'artist ed editur Dino Simonetti che deriva era da Schons. Facit: Era sut nova redacziun sa preschenta la «Terra Grischuna» bain e plaschavlamain.